

Kontuola

ANTZUOLA / Egubakoitza / 2002ko urriaren 25a / 131. zenbakia

KOORDINATZAILEA: Aintzane Irizar • Bärrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Elkartasun Festa egingo dute zapatu arratsaldean

AINTZANE IRIZAR

Ohikoak bihurtu zaizkigu dagoeneko Anelkar Elkartasun Taldeak antolatutako Elkartasun Festak. Biharkoa, baina, berezia izango da. Izan ere, Giokela elkartearen laguntzarekin antolatu dute oraingoa. 18:30etik 20:30era ospatuko dute festa, Zurrategiko plazan.

Anelkarren hasierako asmoa Uruguairako dirua batzea zen, baina azkenean, Senegalgo Casamance eskualdera bidaliko dute bihar, zapatua, ospatuko duten Elkartasun Egunean batutako dirua. Izan ere, irailaren 26an Senegalen gertatutako itsasontzi istripuan Casamance eskualdeko Oussouye herriko 80 lagun hil ziren, eta hango egoera are eta larriagoa da gaur egun.

Istripua izan zuen itsasontzi berean bidali zuten Anelkarrekoek duela hilabete batzuk Antzuolan batutako materiala, istripua baino bi egun lehenago.

SAIHESKI JANA ZURRATEGIN

Biharko Elkartasun Festan Giokela elkarteak emandako eta eurek prestatutako saiheskia jate-



Oussouye herriko neska-mutiko talde bat.

KRISTINA BAKAIKUA

ko aukera egongo da. Esan beazala, Zurrategiko plazan izango da hori, 18:30etik 20:30era, hain zuzen. Horretarako, pintxoak eta ardoa saltzeko postua jarriko dute

hantxe, eta euro bana ordaindu beharko da pintxo eta txikito bakoitzeko. Anelkarrekoek Giokelak eskainitako aukera hori eskertu nahi izan dute.



Txistulariak Katalunian izan ziren

Inguruko herrietako txistulari talde bat Katalunian izan zen orain dela bi aste. Antzuolatik bost txistulari joan ziren, Bartzelonako Euskal Etxeak egindako gonbitari erantzunez. Aurtan, 75 urte bete ditu Euskal Herriko Txistularien Elkarteak, eta hori dela eta gonbidatu zuten kataluniarrek euskal txistulari talde hori. Hilaren 12an eta 13an izan ziren Katalunian, eta Bartzelonan ez ezik, inguruko beste hainbat herritan ere eskaini zituzten kontzertuak./A.I.

HERRITARREN HITZA / Eneko Iturbe • Ikaslea

Gehiegitan, gehiegi

“...Gerrirainoko poltsa bat jarri zidaten...”, “...Une baten, konortea berreskuratu bai, baina ezin nituen begiak ireki, nahiz eta eurek esaten zutena entzun. Urduri jarri ziren eta oihuka hasi ziren mediku bati deitzeko: ‘se nos ha ido’...”, “...hilda nengoela pentsatu nuen...”.

Gehiegitan gertatzen diren jarduerak dira tamalez. Zirrara sortarazten duten egiazko kontakizunak, eta gaur egungo gizarte “demokrata” honetan inongo erreparorik gabe burutzen den estatu terrorismoaren aurpegi krudelena agian. Baina,

ematen al zaie behar adinako trataera eta oihartzuna gizartearen zein komunikabideetan?

Komunikabide gehientsuenei dagokienez, era honetako tortura jarduerarik gertatu ere ez dela egiten sinetsarazi nahi digute, aipamenik egitekotan ere, inongo garrantzirik gabeko trataera emanaz eta benetan daukan pisuaren neurririk inondik ere azaldu gabe egiten delarik.



“Desobedientziaren bideak jorratzeko garaia da”

daude beste batzutan hainbeste aipatzen dituzten giza eskubideak, honelako gertaeren aurrean? Inoiz ez al dute aurpegi eman

Gasteizko gobernuaren auzi honekiko jarrera ere, era berean gaitzestekoa da. Ibarretxe, Balza eta gobernu bozeramaile den Imaz jaunaren hitzek ez dute jadanik inor harritzen, eta gertaera ororen aurrean hartuko duten jarrera antzemangarria izaten da beti. Non

behar benetan zilegi denaren alde, eta bidegabekeria denaren aurrean? Gizarteak noiz esan behar du aho-batez ez dagoela prest honelako bidegabekeriak onartzeko?

Gaur egun ematen den salbuespen egoera honek sortzen duen adierazpen askatasun ezagatik, zail egiten da ahorik irekitzea ere. Baina, egoera honen aurrean, eta honelako zein beste era guztietako Euskal Herriaren aurkako urte luzetako erasoekin behin betirako amaitzeko, bakoitzak dagokion neurrian eta dagokion arloan desobedientziaren bideak jorratzeko garaia da.

LABUR

Zaintzaileendako ikastaroa antolatu nahi du Udalak

Adineko pertsonak edo gaitxoak euren kargu dituzten herritarrendako ikastaroa antolatu nahi du Udaleko Gizarte Ongizateko Sailak.

Ikastaroa antolatu aurretik, baina, parte hartzaile kopurua eta ordutegia zehaztu nahi dituzte ikastaroaren arduradunek.

Hori dela eta, interesa dutenek Udaleko gizarte laguntzailearengana jo dezaketek zalantzak argitzera eta ikastarorako izena ematera, urriaren 31 baino lehen.

ELKARRIZKETA

TERE IRASTORTZA/IDAZLEA

“Ikasketa bide intuitiboena eta fidagarriena irakurketak ematen du”

A.I.
Azaroan hasita, Literatura lantegia eskainiko du Tere Irastortza idazle eta irakasleak, Udal Liburutegiak antolatuta. Antzuolan ekimen berria izanik, lantegi horren gaineko xehetasunak jakin nahi izan ditugu Tereren eskutik.


Zer topatuko du Literatura lantegira doanak?

Literatura lantegira datorrenak, aurrena, irakurle on bat (edo batzuk) aurkituko ditu. Zeren eta idazle izateko batek sentitu behar du eta bere irakurlearen presentzia. Bigarrenik, idazteko erabil daitezkeen prozedura eta teknikak ere aurkituko ditu. Nire asmoa ez da *hau edo hau ikasi behar duzue* adieraztea, baizik eta lantegira datozenek sortu dutenetik abiatu eta behar duten laguntza ematen saiatzea. Hala ere, hasteko, bi abiapuntu erraz jarriko ditut aukeran: egunero-koa eta gutuna. Hortik aurrera inoren esperientzietatik poesia edo ipuina idazteko behar diren hastapenak ere aurkeztuko ditut. **Estilo literarioan idazten, hortaz, ikas daiteke; baina berezko abildadea ere behar-ko da, ezta?**

Idazteko zer esana behar da, aurrena. Hori, idazteko gogoak duten gehienek izaten dute, baina idazteko gogorik ez duten askok ere. Bigarrenik, hiztun-gaitasuna behar du, hau da, euskaldun ona izatea, idazten ohituta ez badago ere. Hirugarrenik, erabili nahi duen generoarekin asmatu behar da. Eta gerokoa, arituaren poderioa ere behar da. Abildadea ez da txarra, baina errazkeriara ere eraman ohi du, beste lanbide eta gauza askotan bezalaxe. Saiatuaren poderioan mamiak irabazten du.

Egoki idazteko, irakurtzeko zaletasuna izatea ere garrantzitsua izango da, ezta?

Bai. Nik uste dut, hala ere, barruan idazteko joera duenak



ARGIA

“Idazteko, aurrena, zer esana behar da, eta hori, idazteko gogoak duten gehienek dute”

berekin ekartzen duela gehienetan irakurzaletasuna. Ezbairik gabe, ikasketa bide intuitiboena eta askotan fidagarriena irakurketak ematen du. **Zeini zuzenduta dago eskainiko duzun Literatura lantegia?**

“Barruan idazteko joera duenak berekin ekartzen du gehienetan irakurzaletasuna”

Edozeini. Bai gazteei, lehiaketetan parte hartu edo sariren bat irabazi dutelako bide hori joratu nahi dutenei... Baina baita jende helduari ere, pasadizo asko gorderik dauzkan horri, norbaitek -agian ezagutzen ez duen norbaitek- irakurri zain.

LABUR

Igartza, Telleria eta Errasti izan dira aurtengo Argazki Lehiaketako irabazleak

Hamalau urtetik beherakoen artean, parte hartzaile guztiak jaso dute saria. 15 eta 25 urte bitartekoetan mailan, Maite Telleriak eta Nagore Igartzak jaso dute lehen saria. 26 urtetik gorakoetan artean, azkenik, Josu Errasti izan da irabazlea. Asteburuan, erakusketa izango da, Olaran etxean, aurkeztutako argazki guztiak.

Azaroaren 10ean (domeka) hasiko dira zinema emanaldiak Olaran etxeko aretoan

Urtero moduan, neguko eta udaberriko hilabeteetan zinema emanaldiak eskainiko dituzte. Azaroaren 10ean hasi eta Aste Santu-ara arte, domeka arratsaldero eskainiko dute film bat.

Aurten, baina, badago berritasun bat: maristena izandako erakinean zegoen zinema aretoan eman izan dituzte filmok, baina aurtengo ikasturtean, Olaran etxean emango dituzte.

Euskal Herriko Naziotasun Aitormenak oraingo astean heldu dira udaletxera

Oraingo astean bertan jaso dituzte Euskal Herriko Naziotasun Aitormenaren agiriak udaletxean. 100 bat lagunek egin dute eskaera Antzuolako Udala agiri horiek tramitatzen hasi zenetik. Agiriok jasotzera joateko deituko diete eskatzaileei Udaleko arduradunek.

Atzo, eguena, argitaratzekoak ziren Udal Etxegintzan izena emandakoen zerrendak

Irailen amaitu zen Udal Etxegintzaren etxebizitzetarako izena emateko epea, eta guztira, 63 lagunek eman zuten izena. Atzo, eguena, egindako osoko bilkuran onartzekoak ziren izena emandakoen zerrenda, eta eskaera guztiak onartu dituzte.

Mendi Federatu Txartela egiteko aukera dago Arrola mendi elkartearen eskutik

Martitzenetan, 19:00etatik 20:00etara, Arrolaren egoitzan, Kalebarrenean, egin ditzakezue txartelak. Aurretik federatuta daudenek ez dute ezer egin behar; lehen aldiz federatu nahi direnek, berriz, Naziotasun Agiria eraman behar dute.

KIROLA

PARTIDUAK

FUTBOLA

Urriak 26
16:30: Antzuola-Bergara B (2. erreg.)

PILOTA

Urriak 26
(Herri mailako pilota txapelketa)
Goizean, 09:00etan, eta arratsaldean, 16:00etan, jokatuko dituzte pilota partiduak.

EMAITZAK

FUTBOLA

Gazteak 4 Antzuola 3 (2. erregion.)
Antzuola 2 Bergara 3 (Gazteak)

PILOTA

Gipuzkoako Kluben Arteko Txap.
Bergara-Olalde (eskuz gazteak). 22-19
Olalde-Añorga (eskuz nag.). 15-22
Oñangu-Olalde (paletaz nag.). 35-29

Giokela, Berme Osoko Okela

ANTZUOLAN

2002 -10- 26

Arratsaldeko 18:00

Antolatzaileak

ANELKAR taldearen aldeko
HARAGI PINTXO DASTAKETA

MUJIKA Harategia eta ANELKAR Taldea



Zer jan, hura izan!